

皆須按日到堂不准曠功如有因病因事不能赴學須由該童父兄赴堂請假

一肄業子弟應用各種書籍以及外洋筆墨紙張凡初入塾時無論貧富概由本堂發給三個月考定後即須本人自行備用若實在貧而無力者始由本堂付給

一諸童赴堂肄業每日由堂備飯一餐其不願食者聽但既入堂讀書不無小費應每人按月給予膏火銀二兩均於十五日支付

一渝城各署官幕聰穎子弟於本堂額滿之外如有願入堂副學者亦聽其便但不給膏火該童亦不必另送教習束脩

一子弟肄業三月期滿由本道考試一次如果功有進益應各酌加獎賞以示鼓勵多則二兩少則一兩其曠功輟業毫無長進不足教誨者立予遣去

一本堂係屬試辦擬租賃民房壹院務求門戶緊密窗牖軒爽爲諸童肄業之地不必重租精飾以節糜費其本堂應用看門水夫厨夫俟開辦時再行酌用共數不得過五人

一學堂之事不可無人督率應設提調一員經理全堂內外事務暫時即以洋關委員充當每月津貼銀八兩

唐景星觀察傳

皇清誥授資政大夫

賞戴花翎

欽加二品銜福建候補道唐公景星傳

觀察姓唐氏諱廷樞號景星行二廣東省廣州府香山縣人也先生少岐嶷孝友性成讀書十行並下習舉業喜以古文爲時文有所作輒驚其羣不汲汲於功名不戚戚於富貴怡怡自得謂吾人經濟根諸學術學術不深卽無以識當世之時務時務不識卽無以應萬事萬變紛至迭來而各妙其用一旦臨大事當大任至茫然無所措手足始悔其前此之不學無術此固學者之通患而亦有識者之所憂也於是遂棄舉業而習洋文時適初開通商諸口岸交涉日繁當道諸君子求能熟識洋務商務者世無其人而先王不特精通天文地理格致算數而已其間水性之沈浮島嶼之出沒路徑之紆折潮汐之變更及風信之順逆往來波濤之瀾灩澎湃隨在皆有以益其才智而拓其心胸爰益潛心探索將以得其要害之所在以儲爲異日

國家之用殫心竭慮寒暑無間積有歲月西學日精聲名日廣彝夏同欽洋務之熟悉一時誰能勝于先生者乎 曾文正公以中國勦興西學遴選諸生出洋肄業檄 先生爲之拔選自此將帥交相器重旋 李傅相以江海利權盡爲外洋所占遂檄 先生會同今津海關道盛杏蓀觀察浙江補用道徐雨之觀察前候補道朱雲甫朱翼甫數觀

察創辦輪船招商局 先生辦理數月綱舉目張井井有條理且中外商情咸稱允洽此商局所賴以振興者也至若外洋公司均有保險以備不虞 先生復仿西法招商集股設立保險公司以固衆商之心而分外洋之利并轉運漕糧得迅速以供天庾嗣在江蘇之上海凡地方勦立清節堂果育堂洋藥局茶葉公所格致書院等事 先生無不首先勸捐以成善舉見有戚友貧乏無不竭力周濟其用情之厚輕財重義即求諸古人中亦不可多得而先生轉爲餘事矣 先生于光緒初年間因籌辦皖省出力勞績蒙上游保奏以道員選用嗣蒙 前福建將軍文 中丞丁奏留閩省辦理洋務交涉事宜其時洋人謀擬由廈門添設電線達於福州當道頗有難色而苦無辭以却之不得已許以官辦嗣爲 總署批駁當時欲作罷論而洋人堅持不允 先生投袂而起卽由福州星馳廈門與洋人再三辨論事遂得寢又值西班牙輪船於臺灣失事爲土人劫殺一案纏訟多年懸案莫結 前閩浙制軍何檄 先生渡臺辦理僅八日遂澈底澄清一時咸誦神明焉又值雲南謀殺洋人一事 李傅相駐節烟臺 先生參贊其事率立和約實以剛直之氣久爲洋人欽服故事得速竣耳 先生又以局輪兵輪用煤購自外洋利權傍流亟思創開煤礦以塞漏卮爾復躬詣開平不避勞瘁勘驗礦苗煤質旣佳遂稟請 傅相開辦開平礦務卽延請礦師日與經營不遺餘晷

十數年大著成效日出煤三百餘萬斤所有海軍鐵艦兵輪暨製造各局所需之煤無不咸資濟用兼辦承平銀礦試辦建平金礦開通河道以運礦煤又查中國向無鐵路先生獨開其先用心可謂良苦矣遂成痰火痼症家人勸以節勞靜養先生毅然曰我受 傅相知遇之隆此時豈我惜身之時哉 先生忠貞報國清白盟心實爲邇日中外不可少之人迨至今秋舊病復發仍總理局務不遑朝夕詎意中秋前咳嗽日甚兼以寒熱交并諸醫皆云積勞所致心血耗盡元氣大虧恐難就痊至十五日病勢已亟十六日勺水不進矣 先生歿于光緒壬辰年八月十七日午時壽終開平礦務津局差次距生于道光壬辰年四月二十日亥時享年六十有一歲嗚呼痛哉老成凋喪幹濟需才不但爲友道惜並爲世道惜矣男子子八人孫五人具有象賢之譽知天之報施 先生者尙未有涯涘而 先生福壽兼全功德並懋昭垂史冊足爲簡編光在天亦應無所遺憾矣 毓桂 與 先生交數十年逾格垂愛情同止水惠貸監河尤非尋常泛交可比駭聞噩耗不覺悲從中來淚流沾頰謹撰蕪詞以述 先生之遺事特惜未能與 先生朝夕晤叙以傳其詳及詢其後人一一編次以俟 大君子論定云并附誄辭識余腹痛其詞曰惟我

皇之御極兮加綸綍于金章任股肱與心膺兮展功業之輝煌立商局於滬濱兮建輪舶以

飛行剏礦務于開平兮起地寶以无量莅閩省以從公兮勤夙夜之黽皇緬整躬以率物兮拯億兆而扶匡惟外彝亦心悅而誠服兮每揆度於中藏悵山斗之云亡兮合中外而悲傷行見褒榮及於身後兮銘鐘鼎與旗常願千秋之俎豆兮垂竹帛以昭彰惟明德之未達兮洵後來之必昌

光緒十有八年九月二十有二日

世愚弟沈毓桂頓首拜撰

富國養民策

艾約瑟

第二章論物之有益於人

^{十四}節論人於銷化中之誤視

嘗聞人云廣費資財卽鼓舞商賈使貿易興盛中極嘉之一道誠屬人所應爲事也爲是說者之意殆謂資財存儲不用懋遷之貨決不能暢銷工人亦不能得善價貨殖之鋪商等自以此言爲是伊等意顯而易見商客來店採買貨愈多店商得之利息愈寬卽採購家亦多以是理爲無誤者緣伊等極喜採辦新式衣服並他人所欣喜之玩好物然卽是語思之伊等如是論辯亦非無誤在內也

實則廣資財者不能不以資本謀生息而充工費也雖不用此種技藝工人決不能不用他種技藝之工人設將餘銀存儲銀號商不能徒韞匱藏必以之權子母而爲得利張